

GUILTS NE GLO PXEEL PABL LO TIMOTÉ

1 ¡Diuzh Timoté!

Naa nac Pabl, tib zha ne pxeel Jesús nonee Xtiidz Ndzon me lo miech. Ible Dios men ne psilaa ne lo dol, ni Jesús men ne rnalo ne, me bnabey quiayun naa dziin rii.

²Laa naa rxeļ guits rii lo luu, rzaac naa luu zig tib xpëed naa ne squi dib zdo lo riladz luu Jesús.

Dios men ne nac Pxoꝛ ne, ni Jesús men ndzon ne rnabey ne, me yquia zdo lo luu, me tsoxco grë zhizhgab luu zeena peet tsienied guic luu. Min co racladz naa, ni min co rnab naa lo Dios.

³Zigne psoque naa diidz lo luu len dze ne laa naa za nëz xtan zha Macedon ga, laa luu biaan Efés i; scagaa niina laaw rneque naa lo luu stib: Sca no luu i, bnee lo bla zha ne squi no i, cseetraade zho miech grë zhiwseed zho, sac ncuaaṅe paat rquiinda. ⁴Bnee lo zho, csaan zho grë cuent gox qui, zhale noyunnroobraa goon dien zharaa, peraa been grë xmengol ne. Ncuaaṅe paat rquiind ga, loxaque runctildiidza miech; mazd lo lal ne nodildiidz zho, tsoxco zho cseed zho miech ganle pe nactaa grë guieṅzaac ne rgaa grë zha ne rquiabladz dib zdo lo riladz Jesús.

⁵Laa naa rso diidz rii lo luu, sac racladz naa guiaanmbe zdo grëse miech qui, guiaanmbe xquieṅrien zho ni dib zdo zho gliladz zho Dios; zeena scagaa grielo gleynie zho samiech zho. ⁶Sac gon, no bla zha ne quiasaanle Xtiidz Ndzon Jesús mine nac diidzli, leṅ lo grë cuent ncuaaṅe paat rquiind co no zho. ⁷Racladz zho zha cseed miech zha nac xley Dios, ni niicle zha riend zha naca; zeene rseed zho miech ni zha riendaque dien pe rnee zho.

⁸Ndionle ne ganle nli wen ley ne psan Dios, per tel niaca mine yquiin miecha zigne psan me yquiina. ⁹⁻¹⁰Golguien ganle, biaan ley par gnabeya grë miech ne nole xnëz Dios, sinque laaw biaan par gnabeya grë:

zha ne racndaan lo Dios,
zha ne rond xtiidz Dios,
zha ntseeb,
zha ngoopdol,

zha ne rzacdraa ne men nroob nac Dios,
 zha ne rguitnie lè Dios,
 zha ne rut pxoz,
 zha ne rut xniaa,
 zha ne rut samiech,
 zha ne rionie zha ne led tsieeld,
 zha ne nac mrazh,
 zha ne rban samiech riecto zho zho stib nöz,
 zha ne rquidie,
 zha ne rzeet lè Dios par gliladz miech xtiidz zho, ni nanpaa zho led
 diidzlid rnee zho.

Par grè zha rii nagon biaan ley; grè zha ne mband zigne nac Xtiidz Ndzon Dios; ¹¹wseed ne rlu ganle zha laa miech lo dol. Ni lèè wseed co gon pso Dios naa none naa lo miech.

Pquia zdoo Dios Pabl

¹²Rded naa xquizh lo Jesús men ndzon ne rnabey ne, porne bzooblo me naa gun naa xtsiin me, ni noyacnien me naa ne laaw quiayun naa. ¹³Ne nligaa rded naa xquizh lo me, sac glo ntseeb goc naa, bneenè naa me, ptsidil naa grè zha ne no xnöz me, ntseeb goc naa lo zho. Ni niicle ne scataa nac grè ncuane ben naa, per pquia zdoo me naa; sac len dze co gard gliladz naa cho nac Jesús, lega lo xquieln xen naa ga sca ben naa.

¹⁴Pa lotaa pquia zdoo Dios naa! Ga blu me ganle zha noxcotaa me naa, pxobnia me guic naa bliladz naa cho nac Jesús, ni zig nac niina dib zdoo naa rleynie naa me. ¹⁵Minè rne naa nu niina, diidzliw, ni racladz naa grèse miech gliladz zho ganle, ible laa Jesús biaad lo guidzliu, biaadsilaa me grèse miech lo xtol zho; ni naapaa gon goc tib zha ne mazdraa ngoopdol. ¹⁶Gacxe waa pquia zdoo Dios naa, niicle ne scataa miech ngoopdol naa per psilaa Jesús naa. Ga blu ganle pa lotaa paciens ne rap me; ni ga gwi grèraa miech ganle, zha ne gliladz me, zгаа zho tib guielmban ne gdzind dze lozh.

¹⁷Tibaque sca golgotsaa dziuunnon ne me, golgotsaa gnee ne grè diidz ndzon lo me, zigtaa niinaw zigtagaa len grèraa izdoo ne ziaada! Sac gon, me nac men nroob ne rnabey, men ne gdzind dze ne nitlo. Sca rieguiaa.

¹⁸Timoté, xin, laa naa rso diidz lo luu gon: Tibaque dziits bzo, ib guiaand zdoo luu; psoladz ganle scaque nac diidz ne bnee grè zha bets ne zeene psiaab Dios guic zho bzeet zho pe nac grè mine pso Dios luu gun luu. ¹⁹Bien tibaque dib zdoo luu bliladz Jesús, ib gund luu ncuane nan luu ndzinlid, zeena ine mbe xquielrien luu; sac gon no zha ne niicle rienpaa zho pa min nac ncuane ndzinlid, ni laa zho runa. Mincoxe waa, grè zha ne sca nac, rsaanga zho mine bliladz zho! ²⁰Zig nac Himené grop Lejandr, sca been zho; per laa zho bzonözle naa sca tsie zho xnöz mendox telne sca racladz zho; zeena guien zho ganle nodne gneenè zho Dios.

Gac-wnab lo Dios por grë miech

2 Laa naa rso diidz lo to: Golguien none gnab to lo Dios por grëse miech ne ndxie lo guidzliu, golinab lo me gunlay me zho, gacniën me zho; ni goldeed xquizh lo me por grëtaa ncuaa^{ne} run me. ²None gnab to lo me gacniën me grëse zha ne nac wxtis, grëse zha ne rnabey, gdeed me guie**l**biini lo zho zaacse gun zho guie**l**wxtis, zaacse gnabey zho; zeena tibliladz cue miech, ine gban ne zigne racladz me, sin choot peet glisquid lo ne.

³Sca nagon nongui**l** dzuun ne, ni scagaa rdziladz Dios, men ne pxeel Jesús biaadsilaa grëse miech lo dol. ⁴Men ne racladz grëse miech sëeb xnëz Jesús, gacnan zho mine nac diidzli. ⁵Guien zho ganle ne tibaque Dios no, ni tibaque men ne zac gdzinnie grëse miech lo me: lëe men co nac Jesús, men ne goc miech biaad lo guidzliu; ⁶sac gon Jesús nac men ne bdeed xquie**l**mban, beet zho me, bdiizh me xtol miech. Min rii nagon racladz Dios gacnan miech len dze rii. ⁷Ni laa me pxeel naa none naaw lo grëse zha ne nacd zha Israel, noseed naa zho grëse mine nac diidzli, zeena guien zho dib zdoo zho gliladz zho Dios. (Mine rne naa nu diidzliw, rquidieed naa.)

⁸Laa naa racladz sca, zaatne notaa zha ne dib zdoo rliladz Dios, grëse zha bgui none gzodiidznie zho Dios. Ni zeene gzodiidznie zho me, none ine mbe zdoo zho, choot lo zha rlëed zho, choot zha nodilnied zho. ⁹Laa grë men wnaa, racladz naa tsoxco zho zaacse gacwxab zho, niowse, tibliladzse gac zho. Sac grë men wnaa ne rliladz Dios, par gluniow zho rquiind ne goon dien paraa xixcuaa guitsguic zho, dien pe quie rbebni, pe or gac xnil zho, gac zhibguiaa zho, pe lar niazh ne gacwgaa zho. ¹⁰Par gluniow zho, rquiin zaacse gbannie zho samiech zho, zig none gban zha ne nole xnëz Dios.

¹¹Zig nac len yadoo, none tibliladzse gac wnaa, dzese sob zho yquiaadiag zho tel pe nac wseed ne noyac; ¹²gnedzd naa diidz ne zha so cseed miech, o zhagaa gnabey lo mgui. None dzese sob zho, ¹³sac gon zeene psan Dios miech lo guidzliu, glose bzaa me Adán, dzigoraa bzaa me Ev. ¹⁴Ni stiba, pquidied mendox Adán, sinque laa ma güeyquidie Ev; ni porne bliladz Ev xtiidz ma, ga bdiits Ev xtiidz Dios. ¹⁵Per silaa Dios wnaa lo xtol zho, telne dib zdoo zho gliladz zho me, tsoxco zho gban zho zigne racladz me, guien zho gun zho mine riegua**l** wnaa, gap zho xpëed zho ni cchoob zho win.

Zha ne so lo grë zha ne ngab xnëz Dios

3 Zha ne racladz so gnabey zho lo grë zha ne no xnëz Dios, tib dziin wen ga rquiabladz zho gun zho. Sca zëeb diidz rnee miech; ni nligaaw. ²⁻⁴Per ga nagon rquiin:

tib zha ne zaacse mban,
zha ne mbannie loxaque wnaa ne nacle tsiel zho,
zha ne tibliladz,
zha ne nixbiini, rien pe run,
zha ne mbe lo, choot lega gzhidznieed zho,

zha ne ine nley rac, rbězlo zho miech lidz zho;
 zha ne rien zha rseed miech,
 zha ne rquiad lo nziu,
 zha ne rleynied dil,
 zha ne wen zdo,
 zha ne zaacse mbannie samiech,
 zha ne rzonald dimi,
 zha ne zaacse mban lidz,
 zha ne rrieelo rnabey lidz, rnabey xpëed,
 zha ne nguzobdiidz nac xpëed, rbeed mëed xquielto zho.

⁵Sac tel zha ne rrieelod gnabey lidz, gnabey xpëed; ¿pe lel ne so zho gnabey zho lo grë zha ne no xnëz Dios dzigo grieelo zho?

⁶Niicle tib zha ne griinpaa psilo bliladz Xtiidz Dios grieelod gac zho dziin co; sac nend lëëque lëë zho gunnon zho, lozh ga lëëque zha yguib guiabdee zho. Golsoladz ganle zha bzhaac mendox. ⁷Ni ye rquiin tib zha ne zëëb xtiidz ne miech ndzinli nac zho, haxta lo zha ne nod xnëz Dios; zeena tsod lega pe glesqui miech lo zho, sca gleyd mendox gac mine racladz ma.

Zha ne gun yudar len yadoo

⁸⁻¹²Scaquegaa zha ne so gun xyudar zha ne gnabey ga, ga rquiin:

tib zha ne zaacse mban,
 zha ne rnee niapse diidzli,
 zha ne rleynied guielgonziu,
 zha ne zienald dimi,
 zha ne dib zdoo rliladz grëse mine zhobnee lo Xtiidz Dios (mine rliladz ne, mine nac diidzli),
 zha ne mbe lo,
 zha ne mbannie wnaa ne nacse tsieel zho,
 zha ne rrieelo rnabey lidz,
 zha ne rrieelo rnabey xpëed.

Ni stiba, antes ne so zho none glugazh zho dien pe nli zrieelo gun zho dziin co. Zig nac tsieel zhow, none gac me:

tib wnaa ne zaacse mban,
 wnaa ne rleynied diidzguizh,
 wnaa ne rleynied nziu,
 wnaa ne rquidied.

¹³Sac zha ne zaacse gun dziin co, ziannziuraa zho lo grë zha ne ngab lo Dios, ni scagaa ine mbe lo zho haxta no ro zho gnee zho lo miech zha nac ne laa zho rliladz Jesús.

Mine rliladz zha ne ngab lo Dios

¹⁴Ib laa guic naa no guaialniob naa i, guaialgan naa luu; per laa naa rxel diidz rii lo luu, ¹⁵zeena telne grieelod guaialniob naa, per laa luu nanle naganle cho

gzo luu yquiaanap grëraa zha ne ngab xnëz Dios nguiamban; zha ne runbey minë nac diidzli, ni rlu zho ganle ne nli diidzliw. ¹⁶Ne nligaa nroobdoo nac wseed ne ziaad lo Xtiidz Dios, minë riladz ne, ngan guien miech zha naca. Nu raquiet minë been me:

Goc Jesús miech biaad me lo guidzliu,
ni blu Espíritu Sant ganle ne nli Xpëédpaa Dios nac me;
ni gon grë anjl me.
Brieets bliaal Xtiidz me grë guiedz,
ndaldoo miech ne bliladz ganle cho nac me,
blozh ga biire zey me lo guieindzon ne no me gbaa.

Zha ne rsaan Xtiidz Dios

4 Ib laa Espíritu Sant rneele ne len dze ne ziaadyob guiaad Jesús stib, ndal grë zha ne riladzle Xtiidz me, laa zho csaana laa zho tsienal grë minë rnee zha ne rquidie, grë minë nac zhiwseed mendox. ²Grë zha ne guiaadnie wseed co, ni lalnu yquiad zdoo zho zeene laa zho yquidie miech. ³Haxta stsidil zho tsielnie miech, znabey zho ycuue ncuuaane gow miech; zig nac zeene led Diosd psan tsielnie miech, zig nac zeene led med psan grë ncuuaane gow zho. Me psana grësew, zeena grëse zha ne ngab xnëz me (zha ne beenbey diidzli), zeene laa zho yquiina gdeed zho xquizh lo me. ⁴Sac grëse ncuuaane psan Dios, wena; zig nac grë ncuuaane rac wagw, peet nacda yquiin new, totsaque gdeed ne xquizh lo me zeene laa ne yquiina, ⁵ni gnab ne gunlay mew; sac zeene rdeed ne xquizh lo me ni rnab ne gunlay mew, rsanmbe mew.

None gun Timoté xtsiin Jesús

⁶Zeene cseed luu grë zha bets ne, zha bzian ne i, pseed zho grë minë rne naa lo luu nu, tibaque minë nac zhiwseed Dios güeynal; sac sca no gun zha ne squi zo quianap grë zha ne ngab lo Dios. ⁷Ib yquiaadiagd luu grë cuent gox, grë cuent nxen ne paat rquiind; sinque Xtiidz Dios bioxco, min co bloonie guic luu.

⁸Zig nac zha ne rguit, wguit ne run zho rioxco zhow, nli rquiina lo zho par gac macis xcuerp zho; per zig nac Xtiidz Dios, mazdraa rquiin dzioxco new; sac mincosi squina lo ne zigtaa lo guielmban riw, zigtagaa lo guielmban ne naraa dzian. new. ⁹Ne nligaa sca rieguijal gun miech, ni grëse zho none tsoxco zhow! ¹⁰Gacxe waa, laa ne quia dien zha gliladz zhow, niicle ne nroob grë guieinë ne quiazian ne; sac ible Dios nac men ne rnalo ne, men nguiamban ne rsilaa grëse miech lo dol; sac grëse zha ne dib zdoo riladz me, rsilaa me zho. ¹¹Bioxco sca pseed zho grë minë rne naa lo luu nu, ni bnee lo zho gun zhow.

¹²Nli lëë tib zha nguiegse nac luu, per blu lo zho ganle zha none gban zho: Zeene gnee luu, niowse bguib diidz ne gnee luu, zaacse goc, ine bleynie samiech luu, tibaque dib zdoo luu bliladz Xtiidz Dios, ine ndzinli wban; zeena gan zho ganle niicle ne zha nguieg luu, per nixbiini luu.

¹³Laga gal dze ne glanso naa i, bioxco blab Xtiidz Dios lo grëse zha bets ne, zha bzian ne i, bnee lo zho zha naca, bnee diidz ne conley zdoo zho;

zeena ine nguieel gac zho. ¹⁴Ib csaand luu grè guielbiini ne bneedz Dios lo luu i (guielbiini ne bgaa luu zeene psiaab me guic grè zha ne rnabey lo grè zha ne no xnèz me, pxobnia zho guic luu). ¹⁵Grèse mine rne naa lo luu nu, bioxcow; zeena gan grèraa miech ganle zigse zie dze laa luu quiayabiinraa lo Xtiidz Dios. ¹⁶Bien zaacse goc, bien mine nac Xtiidz Dios, min co pseed miech, ib csaand luuw; zeena tedlaa luu lo grètaa guielnè ne no guiaad, ni scagaa haxta grè zha ne rquiaadiag wseed ne rlu luu ni rban zhow, ye zho zlaa zho lo guielnè co.

Men wnaa ne gutle tsiel

5 Grè zha bgui gol ne nac bets ne i, zeene zha rxin zho, bien gactoxd luu lo zho, sinque zaacse bnee lo zho zig nac zeene lo pxoz luu nonee luu; niiclegaa zha nguiega, zaacse goc lo zho, been zho cuent zig tib bets luu. ²Scaque grè men wnaa ne nac zhagol, ndooladz bnee lo me, been cuent lo xniaa luu ga zo luu; lo grè wnaa nguiega, ndzinli goc, niowse bnee lo zho, bien ganle rrieequia tib bzian luu ga.

³⁻⁶Grè men wnaa ne gutle tsiel, men ne nlipaa choot rapd, to none cteedlo me; totsaque nli Diosse rnalo me, dze guieel tibaque nozodiidznie me Dios. Sac no zho mban zigne notaa guic zho, laa zho zienal loxaque grè ncuane gdeed guxt xcuerp zho; zha ne sca run, rrieequia gutle zho ga.

Laa tel men wnaa ne scaque gutle tsiel, ni no xpèed me, no xiag me, dzigo zha none cteedlo me; none cseed zho gan zho menlidz zho, gan zho pxoz zho, gan zho xniaa zho, sac gon me pchoob zho. Sca nonguiela, ni scagaa rdziladz Dios.

⁷Pso diidz rii lo grè zha ne nacgrè to i, zeena cseed zho sca gban zho, ni scagaa tsod pe nacne gneenè miech zho. ⁸Sac zha ne tsoxcd gan zha ne nacgrè zho, ni mine mazdraa telne niicle menlidz zho tsoxcd zho gan zho, rdzieeld dzigo guiab zho laa zho riladz Dios, haxta mazdraa nac xtol zho que tib zha ne gard gliladz me.

⁹⁻¹⁰Ni stiba, grè men wnaa viud qui zha ne rquiablaz gun pe xtsiin Dios, bien zha ne psale tsongal iz zha co psèeb lo list. Ni wen wen gocnan telne:

bionied me tib mgui zeene bii zomban tsiel me,

zaacse mban me,

zaacse pchoob me xpèed me,

dib zdoo me rbèzlo me miech lidz me,

ndooladz rac me lo grè zha ne no xnèz Jesús,

run me xyudar grè zha ne no lo tib guielnè;

ni run me niapse ncuane wen ne rquiin lo samiech me.

¹¹⁻¹²Laa grè zha ne bii nguieg, ib yquiaad luu lè zho lo list co; sac nac wnaa nguieg, zeene sob guic zho ctsieelnia zho, laa zho ctsieelnia tib. Loxaque guncal zho xtol zho ga, telne glo rquiablaz zho gun zho xtsiin Dios ni lozh ga laa zho csaanaquew. ¹³Ni ye nac wnaa nguieg, rdziladz zho rquianzè zho; ni telne peet dziin gund zho, racgbech zho; ni stiba, zeene sca guiend pe

gun̄ zho dzigo laa zho rzhixcuaa diidzguizh, laa zho rzëëb lo grë cuent ne rieguialdraa zho.

¹⁴Gacxe waa, racladz naa grëse wnaa nguieg ne sca ret tsieel, mazd ctsieelnia zho stib; zeena yquiaanap zho xpëëd zho, yquiaanap zho ro lidz zho. Sca yguibd zho tso grë zha ne rlëëniele Xtiidz Jesús, gneenëraa zho zha ne rliladza. ¹⁵Sac gon̄, blale wnaa ne sca gut tsieel zieriee xnëz Dios, lel̄ laa zho zienal grë mine rnabey mendox.

¹⁶Psoladza ganle, tel̄ cho tib zha bets ne, tib zha bzian ne i raclidz tib men̄ wnaa ne gutle tsieel, none zha gan̄ me, laa ne gnalo zho ne to yguib dien̄ zha gdioon̄ me; zeena grë ncuanea runlo to i, zgaaw yquiin grë men̄ ne nlipaa guien̄d cho gan̄.

Mine rieguial̄ zha ne zo lo zho

¹⁷Grë zha ne zo rnabey lo grë zha ne ngab xnëz Dios, zha ne zaacse noyun̄ dziin co, zig nac zha ne tibaque rnee Xtiidz Dios lo miech, zha ne rseedgaa miech zha naca, tel̄ palal ncuanea rcaa zho, ible rieguial̄ ycaa zho chop lalgaw.

¹⁸Gotsaa gwi ne ganle zha quia lo Xtiidz Dios, rneew: “Code to guiex ro xma to, zeene no ma ye noguuits ma zhobxtil; igolsaan gow ma!” Laa stib lugar rnee: “Zha ne run̄ dziin, ib none ycaa zho mine non xtsiin̄ zho.”

¹⁹Bien̄ gon̄ Timoté, zeene guiaad zho lo luu, guiaad-zo zho tib men̄ ne rnabey lo to, ib yquiaadiagd luu mine rnee zho, tel̄ne gzod zho chop tson̄ zha ne gon̄ ne nli been̄ me mine rquiaqui zho me. ²⁰Tel̄ne bind me diidz, bii noyun̄ me dol̄ co, dzigo squi ndxie grë zha ne nacgrë to, goctox lo me; zeena sca gdzieb grëraa zho gun̄scad zho. ²¹Zig zobwi Dios, zig zobwi Jesús grë xanj̄l me, laa naa rso diidz lo luu, been̄ mine rne naa lo luu nu. Gdzieebd luu, yquiad zdoos luu, bnee lo zho tel̄ chotaa nac zho.

²²Zeene gzo luu zha ne gun̄ xtsiin̄ Dios, gund̄ luu ne lega tel̄ chotaa gzo luu; sac gon̄, nend lëëtse zha ne rap pe tib falt gzooblo luu, dzigo laa miech guiab nanpaa luu zha nac zho ni rlisquid luuw lo zho. Ible gdeete luu diidz gun̄ luu ncuanea gun̄ctal xtol̄ luu. ²³(Gnid naa togo ible grieelodraa guie luu vin, zac guie luu niipyeeña maase poc poc, laa ne guie luu niab nis; zeena glunëdraa zdoos luu.) ²⁴Sac grë zha ne no lo dol̄, no dol̄ co znuse rzhobnen̄; nogaaw, haxta gal̄ dze ne laa zho gacredz lo Dios, dzigoraaxoobnena. ²⁵Scaquegaa zha ne run̄ guiel̄wen, no ncuaan̄ co znuse glu; nogaaw, niicle ne rluda niina per ible zdziñ dze ne laaw glu.

Zha ne quiazhoo xtsiin̄ ben̄

6 Grë zha bets ne, zha bzian ne, zha ne lega run̄ xtsiin̄ ben̄, none gon̄ zho xtiidz men̄ ne quia zho xtsiin̄; zeena yguibd zho gneenë miech Dios, gneenë zho Xtiidz me mine noseed ne miech.

²Scaquegaa grë zha ne run̄ xtsiin̄ men̄ ne rliladzle Xtiidz Dios, none gon̄ zho mine rnabey me zho; led guiabd zho por bets zhow, gun̄ zho mine racladztaa zho. Ni gale none tsienie guic zho wenraa grieequia grë dziin ne noyun̄ zho;

sac gon lo tib men ne no xnéz Dios ga, lo tib men ne rleynie zho ga yquiin xtsiin zho.

Grése mine none naa lo luu nu, pseed gré miech quiw, ni pso diidz lo zho gun zhow. ³Zrieequia zha ne guiaadnie stib wseed, mine ni nacdraa Xtiidz Jesús; sac zhiwseed Jesús rlu zha gban gré zha ne no xnéz Dios. ⁴⁻⁵Zha ne sca rlu stib wseed, lega:

tib miech niats ga nac zho,
ible peet riend zho,
runbeyd zho mine nac diidzli,
rdziladz zho rdilidiidznie zho miech; ga rlan,
laa miech rdillsa,
laa miech rlëëlsa,
laa miech rbidzgolsa; rlozh ga,
rliladzdraa zho pe rnee samiech zho.

Masaque nan zho telne sëëb zho xnéz Dios, nroob dimi ne gunlo zho.

ÿBieñ ib ctsieelsad luu zha co! ⁶Parga nli zha ne rzëëb xnéz Dios, zeene rzac zdoo zho mine rzoladztaa Dios lo zho, tib guieñzaac nroob ga rgaa zho. ⁷Ni sca nonguiela, sac gon zeene rlanso ne lo guidzliu, peet rlansonied ne; ni scaquegaa zeene laa ne gbi, peet grielod güey ne. ⁸Gacxe waa, none sac zdoo ne ni gley ne totsaque gneedz Dios ncuaañe gow ne, ni ncuaañe gacwxab ne. ⁹Sac gré zha ne rzoobladz xen nroob dimi, no zho rquiil mendox zho run zho ncuaañe ndzinlidraa par gdziniiaa zho dimi co; rlozh ga rzhin lo xquieñmban zho, haxta rnitlo zho. ¹⁰Sac nac dimi, zeene rzoobladzdox miecha, ga rzobni ne laa zho run gré guieñtseeb. Ndal zha ne ziesaan Xtiidz Dios, sac laa zho zienañ dien zha xen zho nroob dimi; per rlozh ga, stib stib guieñne ne ziedzin lo zho.

Dib zdoo Timoté gliladz Timoté Dios

¹¹Sangue luu gon, bieñ ganle xnéz Dios no luu, gund luu gré ncuaañ co. Bioxco zaacse wban, tibaque bioxco gban luu zigne racladz Dios, dib zdoo luu biladz me, bleynie me ni bleynie samiech luu, ndooladz goc lo zho, ni lalnu ib guiaand zdoo luu.

¹²Bleeladz luu been gré dziin ne run zha ne dib zdoo rliladz Dios, zigne run zha ne rie lo dil, rbeeladz zho zho. Gon ganle, laa luu nole nëz ne ygaa luu guieñmban ne gdzind dze lozh, ib csaand luu nëz co; sac niicle Dios ible min co bzooblo me luu. Psoladz ganle, squi ndxie miech bleero luu ne dib zdoo luu rliladz luu Xtiidz Jesús. ¹³Dios (men ne rdeed xquieñmban grëtaa ncuaañe no), ni Jesús (men ne ni lalnu bdziebd zeene güeyzo zho me lo Pons Pilat, bnee me cho nac me); me zobwi ganle ¹⁴laa naa rso gré diidz rii lo luu, bioxco beena zigne no gaca. Tibaque bioxcow haxta gal dze ne gbiire guiaad Jesús, men ndzon ne rnabey ne. ¹⁵ÿIb laa me no guiaad! Ni Dios cxeel me zeene laa dze co gdzin. Dios men nroob ne rnabey, men ne rnabey lo grëtaa zha ne nac rey, lo grëtaa zha ne rnabey. ¹⁶Mesi ib gdzind dze guet me, lo biini ne no mew, tsod zha ne glëb gdzin ga; ni tib miech lo guidzliu rii gard gan me,

ni grieeelodgaa gan zho me. ¡Gacxe waa, ible me none dziuunnon ne, sac gon men non, men rnabey nac me! Min co nagon no dziuun ne.

¹⁷Grë zha ne rapchen, bnee lo zho cseed zho gdaannied zho grë ncuaane rap zho, ib gnalod zho grë ncuaan co; sac gon ncuaane tib rded ga. Dios none gnalo zho, ni mesi rneedz me grëtaa ncuaane wen ne rquiin ne. ¹⁸Gudz lo zho gacmbidzd zho, none gun zho grë ncuaane yquiin lo samiech zho, ycad zho ncuaane quianie zho, ine gun zho xyudar zha ne peet quianied. ¹⁹Zha ne sca gun, tib guieInzaac nroob ne yгаа zho; lëë guieInzaac co gan zho len dze ne ziaadraa. ¡Ni haxta zgaa zho tib guieImban ne gdzind dze lozh!

²⁰Timoté, laa naa rbire rso diidz lo luu nu gon: ib csaand luu dziin ne bneedz Dios lo luu i. Yquiaadiagd luu grë wseed yozh ne ziaadnie stib miech, wseed ne rneenë Xtiidz Dios, niicle ne rnee zha ne ziaadniew zha rac nac zho, per nlid ne diidzli rnee zho. ²¹Sac gon, blale zha ne ziesaan mine nac diidzli, laa zho zianaI wseed co; per riend zho leI znu rziaabnëz zho ga.

Dios men ndzon ne rnabey, me noxco luu, me gzhixcuaa lo grë zhizhgab luu. Me gacnien luu peet tsienied guic luu. *Pabl*